

Punca banjir kilat dikenalpasti

Isu jambatan, pertemuan sungai sert projek dikesan jadi faktor utama

NORAFIZA JAAFAR

BATU CAVES - Jambatan di Kampung Laksamana, penemuan Sungai Batu dengan Sungai Udang dan projek persendirian antara perkara yang perlu diberikan perhatian untuk mengelakkan banjir lumpur berulang.

Pegawai Daerah Gombak, Nor Hisham Ahmad Dahlan berkata, ketiga-tiga perkara itu adalah antara penyumbang terbesar kepada banjir lumpur yang berlaku di lahan kampung di sini minggu lalu.

Menurutnya, pemantauan di jambatan yang dibina pemaju itu merbahaya kepada pengguna terutamanya kepada kenderaan berat melebihi tiga tan.

"Mendapan tanah semakin teruk serta hanya menunggu untuk masa runtuh dan meminta supaya projek River of Life' dapat disegerakan

menggantikan jambatan itu.

"Jambatan yang rendah itu turut menyebabkan sampah tersangkut dan mengganggu aliran air serta memohon pemaju menyelenggarakan jambatan sementara itu," katanya kepada Sinar Harian sewaktu membuat tinjauan tapak baru-baru ini.

Nor Hisham berkata, dalam masa sama, sebuah projek persendirian yang dijalankan tidak sempurna turut menyumbang kepada masalah banjir di Sungai Kertas.

"Sebelum ini tindakan arahan henti kerja telah dibuat kerana kegagalan pemiliknya mematuhi spesifikasi yang ditetapkan oleh Majlis Perbandaran Selayang (MPS) tetapi projek masih diteruskan seperti biasa.

"Kita akan meminta MPS mengeluarkan kompaun ke atas pemiliknya sebagai peringatan dan kesalahan tidak mematuhi arahan

yang dikeluarkan," katanya.

Lawatan kerja turut melibatkan kawasan penemuan dua sungai di sini di mana aliran sungai batu yang deras menyumbang kerosakan pada benteng pengadang seterusnya masalah banjir kepada penduduk.

Tinjauan turut disertai oleh wakil Jabatan Pengairan dan Saliran, Majlis Perbandaran Selayang serta Penghulu mukim Batu.

Minggu lepas Sinar Harian melaporkan kejadian banjir di jajaran sungai batu melibatkan 200 keluarga akibat hujan lebat.

Kejadian tersebut antara yang terburuk dan JPS memaklumkan taburan hujan melampau antara penyebab sungai gagal menampung kuantiti air.

Kelewatan sebuah projek naik taraf sungai juga turut menyumbang kepada masalah banjir.



Kesan mendapan dan sampah yang tersangkut antara punca gangguan aliran sungai.